

## થેસ્સાલોનિક મંડળીલ પાઉલ પ્રેષિતનો લોખલાં પેલ્લા પત્ર પ્રસ્તાવના

થેસ્સાલોનિક મંડળીલ પાઉલ પ્રેષિતનો લોખલાં પેલ્લા પત્ર પાઉલ પોતાના બોરહામાય નવા વિસ્વાસ્યાહાલ આનંદિત કોઅરાહાટી ઈ પત્ર લોખલાં આતા, એટલે જ્યા લોક માઆઈ ટાકલા ગીઅલા આતા ચ્યાહા અનંત અવસ્થા બારામાય ચ્યાહાન, પ્રભુવા ચેઅના (4: 15), યાદ દેવાહાહાટી આસ્વાસન દેનલા જાય હોકે, એને ચ્યાહાન ઈશ્વરીય જીવનાહાટી પ્રેષિત કોઅના. પાઉલે ચ્યાહાન શાંતિથી રોઅના વિનાંતી કોઅયી. એને ચ્યાહાન “બોદયે પરિસ્થીતીમાય ધન્યવાદ દેના” 5:18, થેસ્સાલોનિકી, ગ્રીસ મકોદુનિયા રાજધાની આતી. ઈ મહત્વપૂર્ણ વેપારા વાટેવોય આતા. પાઉલ બેન વોખાત લેખકા રુપામાય વોળાખલો ગીયો 1:1; 2:18 પોતાના મિશનરી મુસાફરી માય થેસ્સાલોનિકામાય મુસાફરી કોઅયી બાકી યહૂદીયાહા વિરોદ લીદે નાહરાહાટી મજબુર ઓઅય ગીયો. ચ્યાહાય તિમોથ્યાલ મોઠા જાગાવોય ગેર યહૂદીયાહા મંડળીઆરે કામ કોઅરાહાટી દોવાડયો, એને તિમોથ્યાય ચ્યાહાન ચ્યાહા બોરહા 3:6 હારી ખોબાર દેની. ઈ પાઉલા પેલ્લા પત્રહામાઅને ચોક હેય, ઓઅય હોકે ઇસવી સન 51 માય લોખલાં ગીઅલા.

### સલામ

1 પાઉલ એને સિલવાનુસ એને તિમોથી આમા ઈ પત્ર થેસ્સાલોનિક મંડળીલ લોખજેહે, જું પોરમેહેર આબા એને પ્રભુ ઈસુ ખ્રિસ્તામાય હેય, પોરમેહેર તુમહાવોય સદા મોયા એને તુમહાન શાંતી દેય.

### થેસ્સાલોનિક લોકહા હારો દાખલો

2 આમા જોવે-જોવે પ્રાર્થના કોઅજેહે તોવે તુમહાન યાદ કોઅજેહે તુમહે બોદહાહાટી પોરમેહેરા ધન્યવાદ કોઅજેહે.

3 જોવે આમા આમહે પોરમેહેર આબાલ પ્રાર્થના કોઅજેહે, તો ચ્યે કામે જ્યે તુમા પોરમેહેરાવોય બોરહો કોઅલા લીદે કોઅતેહે, એને વિસ્વાસી લોકહા મોદાત કોઅરાહાટી તુમા કોઠણ મેઅનાત કોઅતેહે

કાઠાકા તુમા ચ્યાહાવોય પ્રેમ કોઅતેહે, તુમા સતાવણી સહન કોઅતેહે કાઠાકા તુમા પ્રભુ ઈસુ ખ્રિસ્તા પાછા યેયના આશા કોઅય રીઅલે હેય.

4 ઓ બાહાહાય, તુમહાવોય પોરમેહેર પ્રેમ કોઅહે, એને આમા જાંઅજેહે કા પોરમેહેરાય તુમહાન ચ્યા લોક બોનાહાટી નિવડી લેદલા હેય.

5 કાઠાકા આમહાય તુમહાન ઈસુ ખ્રિસ્તા બારામાય હારી ખોબાર ખાલી બોલના કોયજ નાંચ આખી, બાકી પવિત્ર આત્મા સામથ્યાકોય એને પુરી ખાત્રીકોય તુમહાન આખી, તુમા જાંઅતેહે કા આમા તુમહે હારાહાટી તુમહે વોચમાય કેહેકેન રિયા.

6 તુમહાય આમહે એને પ્રભુવા અનુસરણ કોઅયા તુમહાવોય બોજ મુશ્કેલી આતી તેરુંબી તુમહાય ઈસુ ખ્રિસ્તા હારી ખોબારેલ આનંદથી ગ્રહણ કોઅયો, જો પવિત્ર આત્માકોય દેનલો હેય.

7 એહેકેન તુમા મોકોદુનિયા વિસ્તારા એને આખાયા દેશા બોદા વિસ્વાસ્યાહાહાટી નમુનો બોની ગીયા.

8 તુમહે પાયને પ્રભુવા હારી ખોબાર કેવળ મોકોદુનિયા વિસ્તાર એને આખાયા દેશામાયજ નાંચ ફેલાયા, બાકી બોદી જગ્યા જાં આમા જાજહે, લોક આમહે આરે પોરમેહેરાવોય તુમહે બોરહા બારામાય વાત કોઅતાહા, યાહાટી આમહાન બીજહાન તુમહે બોરહા બારામાય આખના ગોરાજ નાંચ હેય.

9 કાઠાકા ચ્યા લોક બીજહાન આખતાહા કા જોવે આમા તુમહેપાય યેના તોવે તુમહાય કેહેકેન આમહાન આવકાર કોઅયા, એને કેહેકેન તુમા મુર્તિપાઅને દુર ઓઇન હાચ્યાં જીવતા પોરમેહેરા સેવા કોઅરાહાટી પોરમેહેરાપાય વોળી યેના.

10 એને ચ્યા પોહા ઈસુ ખ્રિસ્તા હોરગામાઅને પાછા યેયના વાટ જોવાં, જ્યાલ પોરમેહેરે મોઅલાહામાઅને જીવતો કોઅયો, એટલે ઈસુલ, જો આપહાન યેનારી સજા પાઅને બોચાડેહે.

## 2

પાઉલા નમુનો

1 ઓ બાહાહાય, તુમહાન ખોબાર હેય, કા આમહે તાં ઈહીં ચેયના ફાયદાહાટી આતા.

2 તુમહાન ખોબાર હેય, કા પેલ્લા આમહાય ફિલિપ્પી શેહેરામાય દુઃખ વેઠ્યાં એને અપમાન સહન કોઅ્યા તેરુંબી આમહે પોરમેહેરે આમહાન ઓહડી ઈમાત દની, કા થેસ્સાલોનિકી લોકહાય આમહે વિરુદ્ધ કોઅયો તેરુંબી આમહાય તુમહાન ખ્રિસ્તા હારી ખોબાર આખી.

3 કાહાકા આમહે હિકાડના તુમહાન દોગો દેયના નાંચ એને નાંચ ખારાબ વિચારાકોય, કા છેતરાહાટી નાંચ હેય.

4 પોરમેહેરાય આમહાન બોરહાવાળા હોમજીન હારી ખોબાર આખના કામ હોઅધ્યા, યાહાટી આમા માઅહાન નાંચ બાકી આમહે મન પારખનારો પોરમેહેરાલ ખુશ કોઅરાહાટી હિકાડજેહે.

5 તુમહાન ખોબાર હેય, કા આમહાય કાદે દિહી તુમહાન ફુલાવીન વાત નાંચ આખ્યેલ, આમહાય તુમહાપાયને લોબ રાખીન પોયહા મેળવાહાટી નાંચ કોઅયા, પોરમેહેર સાક્ષી દેહે કા આમા એહેકેન નાંચ કોઅજે.

6 કાદે દિહે માઅહા પાયને માનપાન નાંચ હોદયા, કા તુમહે પાયને નાંચ, એને બીજહા પાયને બી નાંચ, એને જો આમા ખ્રિસ્તા પ્રેષિત ઓઅના કારણ તુમહેપાઅને મોદાત માગના આમહે ઓદિકાર આતો.

7 આમા ઈસુ ખ્રિસ્તા પ્રેષિત ઓઅનાથી તુમાહાવોય ઓદિકાર ચાલાડી હોકતા, બાકી આમા તુમહે વોચમાય હાના પોહહા હારકા નમ્ર બોનીન રિયા, એને જ્યા રીતીકોય આયહો આપહે પાહહાન પાલન-પોષણ કોઅહે, તેહેકેનુજ આમહાયબી તુમહે વોચમાય રોચન કરુણતા દેખાડલા હેય.

8 તુમહેહાટી આમહે કળવળા એને બોજ પ્રેમા લીદે તુમહાન પોરમેહેરા હારી ખોબાર દાં ઓલહાંજ નાંચ બાકી આમહે જીવ બી દાં આતા.

9 કાહાકા ઓ બાહાહાય, તુમહાન આમહે કોઠણ મેઅનાત કોઅના યાદ ઓઅરી, તુમહે વોચમાય પોરમેહેરા હારી ખોબારે પ્રચાર કોઅતા સમયે આમા રાત-દિહી કામ-ઘંદો કોઅતા રિયા, કા આમહાન જીં ગોરાજ હેય તી પુરાં કોઅરાહાટી તુમહાન કાય દેઅના ગોરાજ નાંચ પોડે.

10 તુમા પોતે સાક્ષી હેય, એને પોરમેહેર બી સાક્ષી હેય, કા તુમા બોદા વિસ્વાસ્યાહા આરે આમહે સ્વભાવ કોલો હાચ્યો, ન્યાયી એને દોષવોગાર્યો હેય.

11 તુમહાન ખોબાર હેય કા જેહેકેન આબહો પાહહાન હોમજાડહે, તેહેકેન આમહાયબી તુમા બોદહાલ હિકાડતા, દિલાસો દેતા એને હોમજાડતા આતા.

12 કા તુમા ઓહડા જીવન જીવા જ્યાથી પોરમેહેર ખુશ ઓએ, જો તુમહાન પોતાના રાજ્યામાય એને મહિમામાય હાદહે.

### થેસ્સાલોનિક લોકહા બોદલાના

13 યાહાટી આમા સાદા પોરમેહેરા ઘન્યવાદ કોઅજેહે કા જોવે આમા તુમહે વોયમાય પોરમેહેરા હારી ખોબાર પ્રચાર કોઅયો તોવે તુમા વોનાયા તે તુમહાય યા સંદેશાલ માઅહા નાંય બાકી પોરમેહેરા સંદેશ હેય એહેકેન કોઇન સ્વીકાર કોઅયા, એને તી તુમહેમાય કામ કોઅહે, જ્યે ઈસુ ખ્રિસ્તાવોય બોરહો કોઅતેહે.

14 યાહાટી ઓ બાહાહાય, તુમહાય તેહેકેન સતાવણી સહન કોઅયી જેહેકેન પોરમેહેરાવોય બોરહો કોઅનાર્યે મંડળી વિસ્વાસ્યાહાય સહન કોઅયા જ્યો યહૂદીયા વિસ્તારમાય ઈસુ ખ્રિસ્તામાય હેય, કાહાકા તુમહાય બી તુમહે લોકહાપાઅને તેહેકેન દુઃખ વેઠયાં, જેહેકેન ચ્યાહાય યહૂદીયાહાપાઅને વેઠયાહા.

15 જ્યાહાય પ્રભુ ઈસુવાલ એને ભવિષ્યવક્તાહાલ બી માઆઇ ટાક્યા, એને આમહાન સતાવ્યા, પોરમેહેર ચ્યાહાકોય ખુશ નાંય હેય, એને ચ્યા બોદા લોકહા વિરુદ્ધ કોઅતાહા.

16 એને ચ્યા ગેર યહૂદીયાહાલ ચ્યાહા તારણા બારામાય વાત કોઅરાહાટી આમહાન રોકતાહા. ચ્યા ચ્યાહા પાપ વોય પાપ જોડતા જાતહા, જાવ લોગુ પોરમેહેર ચ્યાહાન ડોડ નાંય દેય, એને સેલ્લે નોક્કી પોરમેહેર ચ્યાહાન સજા દેનારો હેય.

### મંડળ્યેઆરે પાછા મિળના ઇચ્છા

17 ઓ બાહાહાય, જોવે આમા વોછા દિહી લોગુ મોનામાય નાંય બાકી શરીરાકોય તુમહાપાયને જુદા પોડ્યા, તે આમહાય મોઠી કળવાળા કોય તુમહાન એઅરાહાટી કોશિશ કોઅયી.

18 યાહાટી આમહાય વિશેષ કોયન આંય પાઉલ તુમહે ઈહીં યાહાટી કોલાદા કોશિશ કોઅયી, બાકી સૈતાન આમહાન તુમહેપાય ફિરી યાહાટી રુકાવાટ કોઅતો રિયો.

19 જોવે આમહે પ્રભુ ઈસુ ખ્રિસ્ત પાછો ચેઅરી, તોવે તુમહાન છોડીન આમહે આશા એને આનંદ, આમહે મહિમા મુગુટ કું રોય? કાય તી તુમા નાંય હેય?

20 નોક્કીજ, તુમાંજ આમહે મહિમા એને આનંદ હેય.

### 3

#### તિમોથીલ દોવાડના

1 યાહાટી જોવે તુમહાન દેખ્યા વોગર આમહા થી નાંય રોવાયાં, તોવે આંય પાઉલ એને સિલાસ આમહાય એથેન્સ શેહેરામાય યોખલા રોઅના નોક્કી કોઅયા.

2 એને આમહાય તિમોથી જો ખ્રિસ્તા હારી ખોબાર પ્રચાર કોઅનામાય આમહે હાંગાત્યો બાહા, એને પોરમેહેરા સેવક હેય, ચ્યાલ તુમહાપાય દોવાડયો, કા તો તુમહાન બોરહા બારામાય મજબુત કોઅે ને ઉત્તેજન દેય.

3 જ્યે થી કાદાબી વિસ્વાસી બાહા કા બોઅહી ઈ દુઃખ વેઠના લીદે બોરહામાઅને ઓટી નાંય જાય, કાહાકા તુમહાન ખોબાર હેય, આપહાન દુઃખ વેઠાં પોડી.

4 જોવે આમા તુમહે ઈહીં રોજે તોવે આમહાય પેલ્લાજ તુમહાન આખી રીઅલા આતા, કા આમહાન દુઃખ વેઠાં પોડી, એને તેહેકેન બોન્યા બી, એને ચ્યા તુમહાન ખોબાર હેય.

5 યાહાટી જોવે માન નાંય રોવાયાં, તોવે માયે તિમોથીલ તુમહે બોરહા બારામાય ખોબાર લાંહાટી દોવાડયો, કા એહેકેન નાંય ઓઅે, કા પરીક્ષા કોઅનારો સૈતાનાય તુમહે પરીક્ષા કોઅયી ઓરી, એને આમહે મેહનાત ઓમથીજ ઓઅય જાય.

#### તિમોથી થી ઉત્સાહિત

6 બાકી તિમોથી તુમહે તાઅને આમહે ઈહીં ચેયન તુમહે બોરહા એને પ્રેમા હારી ખોબાર આખી, એને ઈ વાત બી આખી, કા તુમા સાદા પ્રેમ

ને હાતે આમહાન યાદ કોઅતેહે, એને આમહાન મિળાહાટી કળવાળા કોઅતેહે, જેહેકેન આમા તુમહાન એઅરાહાટી કોઅજેહે.

7 યાહાટી, ઓ બાહાહાય, આમહે બોદા દુઃખ એને સતાવણી બી તુમહે બોરહા બારામાય વોનાયને આમહાન દિલાસો મિળ્યો.

8 કાહાકા જોવે આમી તુમા પ્રભુવોય બોરહો કોઅનામાય મજબુત હેતા, તોવે ઈ આમા જીવજેહે એહેકેન લાગહે.

9 એને જેહેકેન આનંદ તુમહે લીદે આમહાન પોરમેહેરા હામ્મે જાયો, આહાટી આમા પોરમેહેરા આભાર ફેહેકેન માની હોકજે?

10 આમા રાત દિહી બોજ પ્રાર્થના કોઅતા રોજહે, કા તુમહાન પાછા મિળજે, જ્યે થી ઈસુ ખ્રિસ્તાવોય તુમહે બોરહો આજુ મજબુત કોઅરાહાટી આમા તુમહે મોદાત કોઅય હોકજે.

#### મંડળી લોકહાહાટી પ્રાર્થના

11 આમા પ્રાર્થના કોઅજેહે કા, આમહે પોરમેહેર આબો એને પ્રભુ ઈસુ, તુમહે ઈહીં યાહાટી આમહાન મોદાત કોઅય.

12 આમા પ્રાર્થના કોઅજેહે કા, પ્રભુ એહેકેન કોઅે, કા જેહેકેન આમા તુમહેવોય પ્રેમ કોઅજેહે, તેહેકેન તુમાબી બોદહાવોય પ્રેમ કોઅે, એને પ્રેમામાય બોજ વોદતે જાય.

13 આમા પ્રાર્થના કોઅજેહે કા તો તુમહે મોનાલ એહેકોય મજબુત કોઅે, કા જોવે આમહે પ્રભુ ઈસુ આપહે બોદા પવિત્ર લોકહાઆરે પાછો ફિરીન યેય તે તો આમહે પોરમેહેરા એને આબા હારકો પવિત્ર એને દોષવોગાર રોય.

## 4

#### પવિત્ર જીવન જીવના

1 ઓ વિસ્વાસી બાહાહાય, તુમા આમહેપાઅને ઈ શિક્ષણ મિળવી ચુકલા હેય, કા કેહેકેન જીવા જોજે એને પોરમેહેરાલ ખુશ કોઅરા જોજે, એને તુમા એહેકેન જીવતાહા બી, સેલ્લે, આમા પ્રભુ ઈસુમાય તુમહાન ઈ વિનાંતી કોઅતા એને હોમજાડતાહા કા તુમા યા બારામાય વોદતે જાં.

2 કાહાકા તુમા જાંઅતાહા કા તી શિક્ષણ આમહાય તુમહાન દેનલા હેય તી ઈસુ ઓદિકારથી હેય.

3 કાહાકા પોરમેહેરા મોરજી ઈજ હેય, કા તુમહાન પવિત્ર બોના જોજે, એને વ્યભિચાર નાંચ કોઅરા જોજે.

4 તુમહામાઅને યોકાયોક જાંઆ પોતાના થેઅયેવોય પવિત્ર એને માન હાતે વ્યવહાર રાખા જોજે.

5 તુમહાન ઈ કામ જુઠી મોરજયેકોય નાંચ કોઅરા જોજે, જેહેકેન જ્યા લોક પોરમેહેરાલ નાંચ જાંએત આહા હારકા નાંચ કોઅના.

6 યે વાતમાય કાદાય બી બીજહાન છેતારના નાંચ, એને નાંચ આહાવોય અન્યાય કોઅના, કાહાકા પ્રભુ ઈસુ આહાન સજા દેઅરી, જ્યે એહેકેન કામ કોઅતેહે, જેહેકેન તુમહાન આમહાય પેલ્લાજ સાફ રીતીકોય હોમજાડી દેનલા આતા.

7 કાહાકા પોરમેહેરે આપહાન ખારાબ જીવન જીવાહાટી નાંચ, બાકી પવિત્ર જીવન જીવાહાટી હાદલા હેય.

8 યાહાટી જીં માઅહું યા નિયમાહાલ નાંચ માને, તો માઅહા નિયમ નાંચ, બાકી પોરમેહેરા નિયમ નાંચ માને, જો તુમહાન આ પવિત્ર આત્મા દેહે.

### પ્રેમ એને કામ

9 યોકબીજા વિસ્વાસીવોય પ્રેમ રાખના બારામાય તુમહાન લોખના ગોરાજ નાંચ હેય, કાહાકા યોકબીજાવોય પ્રેમ કોઅના તુમા પોરમેહેરા પાયને હિક્યાહા.

10 એને તુમા મોકોદુનિયા વિસ્તારમાય રોનારા બોદા વિસ્વાસી લોકહાઆરે એહેકેન પ્રેમ કોઅતાહા, તેરુંબી ઓ બાહાહાય, આમા તુમહાન વિનાંતી કોઅજેહે આજુબી વોદતા જાં.

11 એને જેહેકેન તુમહાન આમહાય હોમજાડયેલ, તેહેકેન શાંતીકોય જીવન જીવા, એને બીજહા વાતમાય નાંચ પોડતા, એને પોતે મેઅનાત કોઈન કામાણી કોઅના કોશિશ કોઆ.

12 જ્યે થી અવિસ્વાસી માઅહું તુમહે વ્યવહાર એઈન આદર કોએ, એને તુમહાન જીં વસ્તુ ગોરાજ હેય ચ્યેહાટી બીજહા આધારે નાંચ જીવા પોડે.

### ખ્રિસ્તા પાછા યેયના

13 ઓ વિસ્વાસી બાહાણ, આમહે મોરજી હેય કા જ્યે મોઅઇ ગીયે ચ્યા બારામાય તુમહાન જાણ જોજે, એહેકેન નાંય ઓઅય કા તુમહાન ચ્યાહા રોકા શોક કોઆ જ્યાહાન આશા નાંય હેય, કા ચ્યે મોઅલા માઅને પાછો જીવતે ઓઅનારે હેય.

14 કાહાકા જો આપા બોરહો કોઅજેહે કા ઈસુ મોઅયો એને પાછો જીવી ઉઠયો, તો તેહેકેન જ્યે ઈસુવોય બોરહો કોઅતા મોઅઇ ગીયે, પોરમેહેર ચ્યાહાનબી ઈસુઆરે પાછો લેય ચી.

15 આમહાન જીં પ્રભુ ઈસુ પાઅને શિક્ષા મિળવી હેય, ચ્યાપરમાણે આમા તુમહાન આખજેહે કા, આપા, જ્યે જીવતે હેય, એને જ્યે પ્રભુ ઈસુ પાછા યેયના લોગુ જીવતે રોય, તો જ્યે મોઅઇ ગીઅલે હેય ચ્યાહા કોઅતા પેલ્લા ઈસુઆરે નાંય મિળહું.

16 કાહાકા પ્રભુ ઈસુ પોતે હોરગામાઅને યેઅરી, તો ઉચા શબ્દા હાતે આદેશ દેઅરી એને લોક ચોક મુખ્ય હોરગા દૂતાલ હાદતા વોનાચી એને પોરમેહેરા તુતારી કુકલી જાય, એને જ્યે ખ્રિસ્તાવોય બોરહો કોઅતા મોઅઇ ગીઅલે હેય, ચ્યે પેલ્લે જીવી ઉઠી.

17 ચ્યા પાછે આપા જ્યા જીવતા એને બોચી રહું, આપા ચ્યાહા આરેજ વાદળાવોય ઉઠાવાય જાહાંવ, એને આકાશામાય પ્રભુ ઈસુઆરે મિળહું, એને ચ્યા સમયાપાઅને આપા સાદા પોરમેહેરાઆરે રોહું.

18 ચાહાટી યે વાતે થી તુમા ચોકબિજાલ દિલાસો દેતા રા.

## 5

પ્રભુવા પાછા યેયનાહાટી તિયાર રોઅના

1 ઓ વિસ્વાસી બાહાણ, પ્રભુ ઈસુ પાછા યેઅના બારામાય તુમહાન લોખના ગોરાજ નાંય હેય.

2 કાહાકા તુમહાન પુરી ખોબાર હેય, કા જેહેકેન બાંડ રાતી યેહે, તેહેકેન પ્રભુ ઈસુ પાછા યેઅના દિહી અચાનક ઓઅરી.

3 જોવે માઅહે આખતેહે કા આમી બોદા હારાં હેય, આમી દાક નાંય, તોવે અચાનક, ચ્યે મોઠા દુઃખા અનુભવ કોઅરી, ઈ ઓલા જલદાજ

ઓઅરી કા જેહેકેન અચાનક મોચનાવાળી થેએયે બુકામાય દુખતા મુંડહે, એને ચ્યા લોક ચ્યા મોઠા દુઃખામાઅને બોચી નાંચ હોકી.

4 બાકી, ઓ વિસ્વાસી બાહાહાય, તુમા ચે વાતે બારામાય તે આંદારામાય નાંચ હેય, કા પ્રભુ ઈસુ પાછા ચેયના દિહી, તુમહેપાય જેહેકેન બાંડ અચાનક ચેહે તેહેકેન ચેય જાય એને યાથી તુમા ચમકાય નાંચ જાતા.

5 કાહાકા તુમા બોદા ઉજવાડા લોક એને દિહયા લોક હેતા, આપા રાતી લોક નાંચ એને આંદારાવાળા લોક નાંચ હેજે.

6 યાહાટી આપહાન તિયારી વોગાર લોકહા હારકા હુતલા નાંચ રા જોજે, બાકી ચ્યા ચેઅના વાટ જોવીન તિયારીમાય એને હાયવીન રોજા.

7 કાહાકા જ્યે માઅહે હૂવી જાતહે ચ્યે રાતી હૂવી જાતહે એને જ્યે દારવા પીયને સાકલે ઓઅતેહે ચ્યે બી રાતી ઓઅતેહે.

8 બાકી આપા જ્યા દિહયા હેય, બોરહો એને પ્રેમા ચોક જીલમા હારકા હેય ચ્યાલ પોવીલા જી બચાવેહે એને તારણા આશા ટોપ પોવીન હાયવીન રા.

9 કાહાકા પોરમેહેરાય આપહાન સજા બોગવાહાટી નાંચ, બાકી ચ્યાય આપહાન પ્રભુ ઈસુ ખ્રિસ્તા કોઇન તારણ મિળવાહાટી નિવડ્યેહે.

10 ઈસુ ખ્રિસ્ત આપહેહાટી યાહાટી મોઅઇ ગીયો, યાહાટી આમા જો જીવતા હેય યા મોઅઇ ગીયા ચ્યાઆરે કાયમ લોગુ જીવન વિતાવજે.

11 ચ્યાહાટી તુમા ચોકબિજાલ દિલાસો દા, એને બોરહામાય ચોકાબીજાલ મજબુત કોઆ, જેહેકેન તુમા કોઅય બી રીયહા.

### મંડળી લોકહાન ઉપદેશ

12 ઓ વિસ્વાસી બાહાહાય, આમા તુમહાન વિનાંતી કોઅજેહે, કા જ્યા તુમહેહાટી બોજ મેઅનાત કોઅતાહા, એને પ્રભુમાંચ તુમહે આગેવાન હેય, એને તુમહાન માર્ગદર્શન કોઅતાહા, ચ્યાહાન માન દા.

13 જી કાય ચ્યા તુમહેહાટી કોઅતાહા, ચ્યા લીદે ચ્યાહા બોજ આદર કોઆ એને ચ્યાહાન બોજ પ્રેમ કોઆ, એને ચોકાબીજા આરે શાંતિથી રા.

14 ઓ વિસ્વાસી બાહાહાય, આમા તુમહાન વિનાંતી કોઅજેહે, કા જ્યે આળહયે હેય ચ્યાહાન ચેતાવણી દા, જ્યે બીખર્યે હેય ચ્યાહાન

ઈમાત દા, જ્યે નોબળે હેય ચ્યાહાન મોદાત કોઆ, એને બોદહાઆરે ધીરજથી રા.

<sup>15</sup> દિયાન દા કા કાદે તુમહેઆરે ખોટાં કોઅયા ઓરી, તો ચ્યા બોદલામાય ચ્યા ખોટાં નાંચ કોઅના, બાકી તુમા સાદા વિસ્વાસી લોકહા એને બોદહાહાટી હારાં કામ કોઅરાહાટી કોશિશ કોઆ.

<sup>16</sup> સાદા આનંદામાય રોજા.

<sup>17</sup> પ્રાર્થના કોઅનામાય લાગલા રોજા.

<sup>18</sup> બોદી પરિસ્થીતીમાય પોરમેહેરા ધન્યવાદ કોઆ, કાહાકા તુમહેહાટી ઈસુ ખ્રિસ્તામાય ઈજ પોરમેહેરા મોરજી હેય.

<sup>19</sup> લોકહા જીવનામાય કામ કોઅરાહાટી પવિત્ર આત્મા કામાલ મા રોકહા.

<sup>20</sup> ભવિષ્યવાણ્યેહે નાકાર મા કોઅહા.

<sup>21</sup> બોદી વાતહે ખાત્રી કોઆ, કા ઈ પોરમેહેરાપાઅને હેય કા નાંચ, જી હારાં હેય તી માના એને ચ્યા પાલન કોઆ.

<sup>22</sup> બોદી જાતી ખારાબી પાઅને દુઉ રોજા.

**બોરકાત**

<sup>23</sup> શાંતી દેનારો પોરમેહેર ખુદ તુમહાન પુરીરીતે પવિત્ર બોનાવી દેય, તુમહે આત્મા એને જીવ એને શરીર આપહે પ્રભુ ઈસુ ખ્રિસ્ત પાછો યી તોદિહી લોગુ નિર્દોષ રોય.

<sup>24</sup> તુમહાન નિવડી લેનારો પોરમેહેર બોરહાવાળો હેય, એને તો એહેકેનુજ કોઅરી.

<sup>25</sup> ઓ વિસ્વાસી બાહાહાય, આમહેહાટી બી પ્રાર્થના કોઆ.

<sup>26</sup> બોદા વિસ્વાસી બાહાહાન પવિત્ર સલામ કોઆ.

<sup>27</sup> આંચ તુમહાન પ્રભુમાંચ ઓધિકારકોય આગના દેતહાવ કા ઈ પત્ર બોદા વિસ્વાસી બાહાહાન વાચીન વોનાડલા જાં જોજે.

<sup>28</sup> આમહે પ્રભુ ઈસુ ખ્રિસ્તા સદા મોયા તુમા બોદહાઆરે ઓઅતી રોય.

**गामीत नोवो इरात**  
**Bible in Gamit language of India**

copyright © 2022 Beyond Translation

Language: (Gamit)

Contributor: Wycliffe USA

Read and download Bible and several other Christian materials in various formats : [www.freebiblesindia.in](http://www.freebiblesindia.in)

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-02

---

PDF generated using Haiola and XeLaTeX on 2 May 2025 from source files dated 2 May 2025

4883a606-3c54-5975-b41a-ca7f8faf825d